

Serbski flashmob 05.11.2016

W ramiku nakupowanskeje nocy „Romantica” w Budyšinje stej kubłanska referentka Domowiny Rejzka Waldźic a socialna džělaćerka RCW Franciska Zopic lětsa serbski flashmob organizowaťoj. Zaměr akcije bě, na Serbow w Budyšinje skedźbnić, městnosć wokoło Serbskeho domu na Póštowym naměsće wožiwić a na jednore wašnje kontakt mjez Serbami, Němcami a dalšimi nawjazać a tak předsudkam zadźěwać. Přez serbske medije a socialne syće buchu Serbja namołwjeni, so na akciji wobdźělić.

W předpolu je so ideja zhromadnje ze skupinku młodostnych internata Serbskeho gymnazija Budyšin wuwila:

Holcy w serbskej narodnej drasće a hólcy ze serbskimi aksesoirami so nahle na Póštowym naměsće zhromadźa a zarejuja k serbskim zynkam “Šewca”. Po přenjeju štućce zapřijeja woni tež přihladowarjow do zhromadnjeje reje. Po wuklinčenju poslednjeho zynka so runje tak spěšnje zaso zminu, kaž su so zhromadźili.

Dešćikojteho wjedra dla njebě popođnju wjele ludźi po puću. Přeni přeběh, kotryž bě za 16:30 hodź. planowany, so sylneho dešća dla wotpraji. Město toho wopyta



skupinka młodostnych wobchody w bliskosći a skedźbni tak na Serbow. Filmowy team SAEK jich přewodźeše.

Po 18:00 hodź. so wjedro tak daloko změrowa, zo móžachu młodostni flashmob hišće dwójce přewjesć. Běše to poradžena akcija, kotraž so wo dobru naladu na Póštowym naměsće postara.

Hladajo na přichodnu nakupowansku nóc měło so na to džiwać, zo je tež Serbska kulturna informacija wotewrjena. Mnozy, mjez nimi tež Serbja,



kotřiž hewak tak husto do města njeprějedu, so jara džiwachu, zo bě SKI zawrjena. Póštowe naměsto móhło so jasnišo pod hesłom „Serbski róžk” do měščanskich swjedženjow zapřijeć. Příklad za to je „Serbska wjes” na dnju Saksow 2011 w Kamjencu.

Wutrobny džak wšitkim młodostnym za jich angažement!

Franciska Zopic